



Class 499.211 No. B28
v. 4

Presented by

H. H. BARTLETT COLLECTION
ON THE PHILIPPINES NO:

132L



NOVENA

SA MALOUALHATING AMA,T, DOCTOR

AT ILAO NANG SANTA IGLESIA

NA SI

SAN AGUSTÍN


DATI NANG LIMBAG

SA UICANG CASTILA, AY TINAGALOG NANG

P. PREDICADOR

FR. JUAN SERRANO,

SA ORDEN NITO RING MABUNYI AT MARILAG NA AMA



GUADALUPE

Pequeña imp. del Asilo de huérfanos.

—
1887









NOVENA

SA MALOUALHATING AMA,T, DOCTOR AT ILAO
NANG SANTA IGLESIA NA SI

SAN AGUSTÍN.

Sa Amang ualang pinagmulan, sa
Anac niyang bugtong, sa Espiritu
Santong mangaalio, iisang Dios at
tatlong Personas.

Sa camahal-mahalan at cataas-taasang
misterio nang Trinidad na casantosanto-
san nagcucusang nonoui, cun бага sa cusa,
itong Novenas nang mapantas na Doc-
tor at Ama nang santa Iglesia na si san
Agustín na Ama cong liniliyag, sapagca
cun sa Dios Ama inahihinguil ang capang-
yarihan, sa Anac ang carunungan at sa
Espiritu Santo ang sinta; ang sinta, caru-
nungan at capangyarihan, ay siyang sinag
na ipinagbibigay liuanag sa sangdaigdigan
nang arao nang santa Iglesiang si san
Agustín. Ang pinagcacaquilalanan nang ca-
lac-han nang caniyang capangyariha,t, ca-
bagsican, ay ang pagca inamin nang santa
Iglesia ang lahat niyang aral tungcol sa

gracia, tuloy siyang pinasasampalatayanan sa sangcacrastianohan. Hayag naman ang caniyang carunungan at ang baquit siya,i, águila nang mangá Doctor, ay lungmipad pa naman siyang nagpacataas-taas, na nangyari niyang siniyasat at inonaua ang cataastaasan at calihim-lihimang misterio nang Santísima Trinidad, nang mangyaring malipol ang lahat nang mangá camaliang linalang nang mangá erejes laban dito sa Misteriong ito.

Nguni ;saan di? Palibhasa,i, naquinabang siya sa Dios Ama nang capangyarihan, sa caniyang bugtong na Anac nang caniyang carunungan, at ang Dios Espiritu Santo nama,i, nagecaloob at naghulog sa caniyang puso nang caniyang sinta; si san Agusting din ang nagbigay pagcatotoo nito; na ganito nga ang marahil niyang uini-uica sa Panginoon Dios: *Cun ga icao, aniya, Panginoon co ay si Agustino, at ga ang Dios na ay aco, iiuang co ang pagca Dios co, at ibibigay co sa iyo,t, nang icao ang maguing Dios co.* Si, sapagca palad co aya, cun aco,i, maguing dapat magcamit nang gagaduplis man lamang na quidlat nang gayong sinta, na icapaglathala nang pananampalataya, maningas na pangayupapang pagcauili at maliyag na pagbunyi dito sa casanto-santosang at caningasningas na Trinidad.

Sa iyo nga, jaba Trinidad Santísima! ini-aalay at inihahayin nang totoong panana-

guisuyu,t, pagpapacababa at tunay na pangangayupapa niring loob co itong Novenas, na бага man munti sa tingin, ay ang tungo,i, calaquilaquihan. Cahimanauari ang mangа loob nang mangа tauo, ay mangа sulong at magsipanibulos na pagdongdongang pangadying, nang macamtan nila ang lubhang maalam at macapanyarihang ampon at saclolo nang maningas na puso ni san Agustín na pinaglaosan nang tunod, sampon nang mangа cabanalan at graciang hinihingi dito sa Novenas na ito; siya cong nasa,t, pita, siya co rin namang iniamo-among idinaraing, idinalangin at hihingi sa Dios Ama na macapangyarihang tunay, sa Dios Anac na carunungang lubos, at sa Espiritu Santong apoy na sintang tibobos, iisang Dios na totoo, na nabubuhay at naghahari magparing man saan. Siya naua.



BILI,T, TADHANA

SA PAGNONOVENAS CAY SAN AGUSTÍNG
NA AMA NATIN.

Cacailan mang panahon at cacailan mang arao, ay sucat mul-an at gauin itong Novenas, ayon sa pagcauili ó pagcasalat nang isa,t, isa; nguni ang lalong tapat, ay cun mul-an sa icadalauang puong arao

3

nang bouang Agosto, at nang masadha,t, matapos sa icamaycatlong ualo; arao nga na ipinagpifiesta sa caniya nang santa Iglesia; at cun dili caya, ay sucat mul-an sa icamaycatlong pitong arao nang bouang Abril; at nang matapos sa icalimang arao nang Mayo, arao nga nang catacatacang pagbabalic niyang loob sa Dios.

Sa arao nang camumul-an ay magcocomulgar, at sa boong siyam na arao, ay magpapacapilit magingat sa anomang pagcacasala nang marapat sa ating Panginoong Dios ang caniyang hinihingi. Arao arao ay darasalin ang unang *Panalanġin* at aacalain sa loob at gunamgunamin, na siya,i, humarap sa casanto-santosang Trinidad; at saca isusunod ang icalaua na natatala sa ibaba sa balang isa,t, isang arao, at cun matapos ay mangadyi nang tatlong *Ama namin* at tatlong *Aba Guinoong Maria*, puri at dangal sa Santisima Trinidad na sininta nang totoong pagniningas nang puso ni san Agusting Ama natin, at saca isa pang *Ama namin* at *Aba Guinoong Maria*, puri at bunyi sa maliyag na alab at ningas nang caniyang dibdib.

Saca naman isusunod na babasahin ang mangã touang dalit na nasa cauacasan nito.



NOVENA

SA MALOUALHATING AMA,T, DOCTOR AT ILAO NANG SANTA
IGLESIA NA SI

SAN AGUSTING AMA NATIN.

*Cun macapagmula nang mag Ang tanda
nang Santa Cruz at macapag Panginoon
cong Jesucristo, ay babasahin itong Pana-
langing masusunod at oolitin din sa arao
arao.*

PANALAÑGIN SA ARAO ARAO.

Sa harapan mong camahal-mahalan, Pa-
n̄ginoong macapangyayari sa lahat, iisa
sa pagca Dios at tatlo sa pagca Personas;
ay ipinagpapatirapa co yaring caabaan co
at ang hiling co,t, nasa, ay ang balang
nang panimdimin, gaui,t, uicain co dito sa
pagnonovenas na ito,i, paraparang maoui,t,
mahinguil sa pagpupuri,t, pagdarangal sa
Iyo. At sapagca naquiquilala co,t, natata-
lastas ang pagcababa, pagcamura,t, pag-
caual-ang halaga nang mang̃a gaua co,
ang tica co,t, nasa ay ipaquisama,t, ilang-
cap sa mang̃a ualang hangang carapatan
at Pasiong camahal-mahalan nang aquing
Pan̄ginoong Jesucristo, at nang mahuga-
san nang caniyang mahal na dugo ang
aquing caloloua, luminis at mauala ang
dilang libag nang casalanan at mang̃a pi-

tang masasama. Inilalangcap co nama,t, pinipintacasi ang manga carampatan nang calingas-lingas na Virgeng si Guinoong santa Maria, at nang calahat-lahatang an-geles at santos; at ang bucod cong pini-pintacasi ay ang Ama cong liniliyag na si san Agustin, at ang ampon niya,t, saclolo ang ninanasa co,t, hinahangad dito sa pag-nonovenas na ito. At yayamang icao, Santo,t, Ama cong minamahala, ay naguing arao na nagpaunaua at nagpaliuanag sa boong sang mundo nang calalin-lalimang misterio nang Santisima Trinidad doon sa labing limang guinaua mong libro; at ang puso mo,i, naguing carurucan nang Trinidad na casanto-santosang, ayon sa ipinahayag nang angel cay san Sigisberto, ay saan di aamini,t, ipagcacaloob ang anomang iyong dalangin. Caya nga yata idalangin mo aco sa Panginoong Dios nang tauad sa aquing manga casalanan, manga arao at tulong na ipagpepenitencia co,t, ipagdurusa nang tapat sa manga calilohang co; at ang bucod co pang hinihingi dito sa pagnonovenas na ito; at ang idinaraing co pang isa sa iyo, Ama cong iguinagalang, ay ang yayang icao noong nabubuhay pa dini sa ibabao nang lupa, ay naguing tagapagtangol at tagapagsangalang sa pananampalataya, at ang caniya pang santa Iglesia, ay ipinagbilin at ipinagcatiuala sa iyo nang caniya ring Esposo na si Jesucristo, ay ipatuloy mo

rin n̄gayong na sa Langit ca na ang dati mong ampon, at pagpilitan mong hingin sa Panginoong Dios na palataguin at palaguin sa boong sangmundo ang totoong pananampalataya, ang magecasundong too ang lahat na manga haring cristiano, at ang matuto pa silang magutos at magpasunod sa sangcacistianohan nang dilang ipagpupuri,t, ipagdarangal sa Panginoong Dios na nabubuhay at naghahari sa Langit magparating man saan. Siya naua.

ICALAUANG PANALAÑGIN

SA UNANG ARAO.

Dios at Panginoon cong macapangyari sa lahat, na sa carunungan mong ualang hangan ay pinapaguing liuanag mo ang cariliman, noong baliquin mo ang ualang casinglalam na bait at loob nang aquing Amang si san Agustin, at pinapaguing ilao mo nang pananampalataya, at arao na maliuanag nang santa Iglesia, na magsasaysay at magpaunaua sa boong sangmundo nang manga Misterio mong mataas, at parang diamante cun mutyang mahal, ay liniloc mo,t, pinalambot nang manga luha nang Ina cong si santa Monica, at pinili,t, hinirang na magcalat at magpahayag nang iyong casantosantosang ngalan, ay aco,i, nagaamo-amo sa iyo, Dios co, na pacundanang sa caniyang manga carapatan, ay aco,i, pagcalooban mo nang

liuanag na icatuto cong malis at lumayo sa casalanan, at icagagaling nang dila cong gagauin; at pacundangan naman sa pagal niya,t, pagod sa pagsasangalang sa pananampalataya, ay pagcatibayin mo ang aquing loob, sampon nang mangã loob nang lahat na mangã capoua co tauo sa totoong pananampalataya. At sa iyo naman, Ama cong liniliyag, ang hinihingi co, ay pacundangan sa catacataca mong pagbabalic loob sa Panginoon Dios, ay idalangin mo aco sa caniya nitong aquing idinaraing; at ang hinihingi co pa naman dito sa pagnonovenas na ito, ay inaasahan co ring cacamtan, pacundangan sa ampon at mangã carapatan mo, nang marangal at mabantog ang caalaman nang Dios sa aquing magparating man saan. Siya naua.

Ang apat na *Ama namin* at *Aba Guinoong Maria*, ayon sa *sinasabi sa mangã bilin*.

ICALAUANG PANALANGIN

SA ICALAUANG ARAO.

¡Aba liniliyag cong Amang si san Agustín! yayang nagningas ang iyong puso na parang arao, na hindi napupugnao, at hiuaway man sa catauan, ay nagbibigay pagcatotoo at ipinaquiquita nang moli,t, moling paglulucso ang alab at ningas nang sinta sa Dios, na namahay sa iyong dibdib, at

icaò rin ang nagpahayag at nagcompisal nang pagca icaò ay nasugatan nang pala-song sinta; aco,i, nagaamo-amo sa iyo, Ama cong mahal, na alang-alang dito sa camahal-mahalang alab, ay dalanginin mo sa Panginoon Dios, ang aco,i, siga,t, sunoguin nang quidlat nang sinta sa caniya, at nang cun masangag at luminis ang aqing dibdib, ang Dios na lamang ang ouia,t, patunguhan nang dilang pita,t, nasa nang loob co; at gayon din namang aco,i, nagaamo-amo sa iyo na idalangin mo rin sa caniya itong aqing hinihingi sa pagno-novenas na ito, cun macacaayon at mara-rapat sa panininta sa Dios, at nang cun matularan co ang malinis mong sinta dito sa buhay na ito, ay maguing dapat acong masama at maramay sa iyong magningas niyong sintang mapalad na inaasahan nang aqing caloloua, na hindi matatapos magparating man saan. Siya naua.

Ang apat na *Ama namin* at *Aba Guinoong Maria*.

ICALAUANG PANALANGIN SA ICATLONG ARAO.

¡Aba Panginoon at Dios na mapagcalinga! na nagcaloob sa aqing Amang si san Agustin nang maningning at masinag na carunungan, palibhasa,i, arao nang santa Iglesia, na nacapagpapanao nang dilim

nang mangã eregias, naguing maestro nang mangã Doctores, paraluman nang mangã cristiano, at nang sila,i, matuto,t, houag masinsay sa daan nang pananampalataya; at naguing patnugot, na cahalimbaua niyong columnang alapaap at apoy na natnugot sa mangã campon mong bayan sa una, at itinuturo sila sa lupang pangaco mo sa canila, at nacasisira sa mangã matitigas na loob na dumurouahagui,t, ongmuusig sa canila. Ay ang idinaraing co sa iyo, Panginoo,t, Dios co, ay ang pacundangan sa pagpipilit niyang magpaliuanag nang loob nang mangã tauong nagecacamali,t, nasisinsay, ay pagcalooban mo aco nang liuanag na icaalinsunod co sa mahal mong calooban, at icalalayo co,t, icailag sa cariliman nang mangã camalia,t, casamaan. At icao naman Salomón nang mangã cristiano, calarahin mo aco sa Panginooon Dios, at caniyang ipagcaloob sa aquin, at tuloy pa namang pacamtan sa aquin itong aquing hinihingi sa iyo dito sa pagnonovenas na ito, at nang cun paratihin cang purihin nang aquing caloloua, ay tumouid ang mangã hacbang nang aquing buhay, hangan di sumapit at mahanganan sa caquinhouahang ualang hangan. Siya naua.

ICALAUANG PANALANGIN SA ICAPAT NA ARAO.

Aba cabababaang loob na Jesús! Na baquit icao ay maningas at maliuanag pa sa arao, ay tiquis cang nagpacaonti, at ipinaglingid mo ang ningning at sinag nang iyong carununga,t, camahalan sa alapaap na marupoc nang aming catauohan, at nagca-loob ca sa aquing Amang san Agustin nang malacas na loob na ipinagpaualang, halaga,t, ihinamac nang dilang puri at dangal dito sa ibabao nang lupa; at tulad sa iyo, at nagdamit nang mababa at murang damit ermitaño, binago,t, binalic ang manga dati niyang camalian, at isinulat na ipinahayag sa boong sangmundo ang caniyang manga casalanan nang totoong caguilaguilalas na capacumbabaan nang loob, na di pinangahasang tularan nang sino man. Diyata, Dios at Panginoong co, aco,i, nag-aamo-amo sa iyo,t, dumaraing na iyong casihan, sidla,t, hulugan ang aquing caloloua nang totoong capacumbabaan, at nang maiubos cong icompisal ang lahat na manga casalana,t, camalian co, at nang paualang halaga,t, hamaquin ang dilang capurihan dito sa buhay na ito, at houag acong may ibang pagnasa,t, pitahin, cundi ang hamaqui,t, ayopin dahilan sa pagca-ibig sa iyo. At sa iyo naman, Santo,t, Pantas na Doctor, dumaraying din aco na

idalanġin mo aco sa Panġinoong Dios nitong capacumbabaang loob, sampon nang hinihingi co sa iyo dito sa pagnonovenas na ito, at nang cun mahouaran co ang cababaan mong loob, ang Dios na nagparanġal at nagpapala sa mababang loob, ay pagpalain niya acong papagcamtin nang corona sa caloualhatian sa Langit. Siya naua.

ICALAUANG PANALANĠIN

SA ICALIMANG ARAO.

¡Aba malubay at catiis-tiisang Jesús! na nagcaloob sa Ama cong san Agustín, nang maningas na nasa,t, ibig sa cagalingan nang manġa caloloua; na parang arao na masicat, ay dili isamang lumamlam at nagcolimlim ang caniyang ningning at sinag sa pagpapaliuanag sa manġa tauo nang caniyang pangangaral; at nagdalita na ualang sauang nang madlang saquit at carouahaguinan sa manġa eregeng nagbubudhi sa caniya nang camatayan; at bagcus sa malaqui niyang pagnanasang maguing martir, ay dili nġa isa man nanghinauang magtiis, at ang dinorongdong niyang uiniuica, ay ganito: Panġinoong co, aniya, pagcalooban mo aco nang icapagtiis, at dagdagan mo pa,t, ololan ang saquit at hirap. Caya nġa Panġinoong co, pacundanġan sa di masaysay niyang pagtitiis, ay pagcalooban mo aco nang icapagtitiis co

nang hirap, at hologan mo aco nang maningas na nasang maghirap dahilan sa pananamlataya. At yamang iniadya mo ang caibigibigan mong Doctor sa maraming pangangib, nang maguing calasag nang sangcacrastianohan, aco,i, nagaamo-amo sa iyo, na ipagadya mo naman aco sa casalanan at sa tanang caauay co, naquiquita ma,t, di man naquiquita. At sa iyo naman, Amacong iniibig na san Agustin, ay dumaraing aco na idalangin mo aco nito rin sa Panginoon Dios, sampon nang hinihingi co dito sa pagnovenas cong ito, at nang tulad sa iyong dalita ay matiis co,t, maralita, bayad at dusa sa mangca salanan co, ang tanang cahirapan dini sa buhay na malait, hangan di macasapit sa tiuasay na doongan sa Langit. Siya naua.

ICALAUANG PANALANGIN

SA ICAANIM NA ARAO

Aba Dios at Panginoong co! Na pinagpala mo ang caloloua nang Amacong san Agustin, sa pinacalangit nang iyong santa Iglesia, at pinarating mo sa cataas-taasang pagninilay, na ga nauaualang loob at natitilihan sa mangca babalaghan mong Misterio, at nagecamit pang nanood dini sa buhay na yari nang Trinidad na casanto-santosang, at naging dapat numamnam nang dugong camahal-mahalan sa taguiliran nang aming Panginoong Jesucristo, at

nang calinalinamnamang gatas nang casanto-santosang Virgen María, at pinagitanan nilang mag-Iua na uala siyang matotohang lingonin nang malaquing pagcatoua, at ungmalab na sungmilacbo ang apoy nang caniyang sinta cay Jesús at cay María: ay paningasin mo naman, Panginoon co, ang dibdib co sa pagcauili cay Jesús at sa caniyang casanto-santosang Iua. At sa iyo naman, Arao na maalab, aco,i, ungmaamo-amo, na pacundangan sa catouaan mong quinamtan dito sa mangá caloob sa iyong ito, ay idalangin mo aco sa Panginoon Dios nang graciang hinihingi co dito sa novenas na ito, at idalangin mo pa naman aco nang caliuanagan nang loob, na icatututo cong magnilay nang mangá camahalan niya,t, caloob, at nang cun maboong manatili ang aquing loob dito sa pagninilay na ito, ay houag acong may hanapi,t, hangarin, cundi ang igaganti cong catampatan, at nang purihin ang caniyang camahalan magpasaualang hangan. Siyanaua.

ICALAUANG PANALANGIN SA ICAPITONG ARAO.

¡Ay Jesús! Dios na totoo,t, Maestro nang tanang sarisaring cabanalan, na inilagay mo,t, inihalal dini sa ibabao nang lupa ang aquing Amang san Agustin, dili nang pamahayan nang lahat na mangá cabanalan

lamang, cun di nang alagaa,t, diliguin (at parang totoong arao) ay palagoin pa naman niya ang manga cabanalan sa halamanan nang santa Iglesia, at magacay siya,t, manogot sa pitong puo;t, limang Religión, na umaalinsunod sa liuanag nang caniyang casanto-santosang Regla at aral nang totoong pagpapacaruc-ha, pamimintuho at pag-iingat sa cahalayan; ang idinaraing co sa iyo, Panginoong co, ay ang itanim mo sa caloloua co ang lahat nang cabanalan, at nang cun aco,i, maguing duc-hang totoo sa loob, at mapagingatang co ang dilang cahalayan, at masunod co ang manga utos mo, ay maguing dapat pamahayan ang puso co nang Santisima Trinidad. At sa iyo, casanto-santosang Patriarca, dumaraing naman aco, at dumaalangin na aco,i, anaquin mo, di man aco dapat, at ipagcaloob mo sa aquin ang hinihingi co dito sa novenas na ito, sampon nang icao rin ang parating maguing panogot, paraluman at Maestro co, at nang sa tulong nang iyong liuanag ton-tonin nang caloloua co, na houag ding masinsay, ang itinuro mong daang cabulusan sa Langit. Siya naua.

ICALAUANG PANALANGIN

SA ICAUALONG ARAO.

¡Aba Panginoon at mananacop sa amin!
na nagbigay cang pasunod sa Ama cong

san Agustín, nang tularan niya ang maningas mong pagca-ibig sa mangã caloloua, at caya inibig niyang minahiguit ang mamatay siya, houag lamang niyang maquitang hinahamac ang mangã tantong dapat igalang na mangã casangcapan sa Simbahan, at houag mapanood nang maibiguin niyang mata ang libuti,t, pag-itanan nang caganiran nang mangã ereges ang mangã obejas niyang caual, at pinagcalooban mo rin siyang maglingid nang caniyang liuanag, at mamatay nang magpanibagong mabuhay sa lalong mabuting langit, at pinagpala mo siya sa calouallhatian nang Langit, at isiniping mo sa mangã Apóstoles, ayon sa napahayag sa isang mahal at santong Obispo, at doo,i, nagbibigay siyang dilag sa ibang mangã Santos, ayon sa naquita ni santa Gertrudis: Ay pagcalooban mo naman aco, Panginoong co, nang totoong pagca-ibig sa mangã capoua co tauo, at ipagcaloob mo namang manatili sa tunay at totoong pananampalataya, at sa boong pagsunod sa santa Iglesiang Ina namin, itong caharian at ang sangcacristianohang bayan. At icao naman, mahal cong Amang san Agustín, yayang ang uica ni santa Gertrudis, ay naquita ca niyang dumaralangin sa casantosang Trinidad, na papagningasi,t, paalabin nang totoong sinta sa Dios ang mangã puso nang mangã tauong mauilihin sa iyo; aco,i, nagaamo-amo sa iyo nang totoong capacumbabaan, na pacam-

tan mo sa aquin yaon alab na yaon, sampon nitong hinihingi co sa iyo dito sa novenas na ito, at nang parang pagninngas nang puso mo, ay magninngas naman ang puso co sa harapan nang Santisima Trinidad magparating man saan. Siya naua.

ICALAUANG PANALANGIN SA CATAPUSANG ARAO.

¡Aba casantosantosang Doctor, Arao ca nang sangcacistianohan! dili lamang sa aral mo, liuanag at ningas, cun di sa mang'a tulong mo,t, saclolo, na ipinagcacalinga mo sa mang'a mauuilihin sa iyo, at pinagcacalooban mo sila nang buhay at cagalingan sa caloloua,t, catauan, at iniingat mo,t, ini-aadya ang puri at ari nang balang nang napaaua at napasasaclolo sa iyo, at ngayong mamatay ca na, ay ipinararati mo rin ang iyong calinga, caya nga yaong iyong tubig na bumubucal sa pinagbaonan sa iyo, ay nacapagbibigay mata sa mang'a bulag, lacas sa mang'a mahihin, caaliua,t, cagalingan sa balang nang macainom noon, at doon naman sa Tolong bayan, ay napatanghal ca,t, napakitang nugao nang balang, at iniaboy mong inilulunod sa ilog; aco,i, dungmaring sa iyo, na gamotin mo ang aquing mang'a saquit at pagalingin mo ang aquing caloloua, at iadya mo itong boong caharian sa mang'a dinaralitan casaquitan,

sa mangã lindol, mangã pagcacagutom, at sa iba pang mangã sarisaring cahirapan, tuloy ipagcaloob mo naman sa aquin ang hinihingi co sa iyo dito sa novenas na ito, yayang sa boo cong loob ay nauuiuli aco sa iyo. At icao naman, Dios at Panginoong co, tatlo sapagca Personas at sapagca Dios ay iisa, na tantong Cang dapat tac-han, dili sa iyong mangã camahalan lamang cundi sa mangã cababalaghan pa namang gaua nang iyong mangã Santos, ipagcaloob mo rin sa aquin ang hinihingi co dito sa pagnonovenas na ito, maguing pagpapahayag mo baga nang iyong aua,t, caalaman, maguing pagpapaquita mo naman nang iyong pagcaibig sa casanto-santosang mong Doctor, at nang cun amponin aco nang gayong camahal na pintacasi,t, maestro, ay mapanoto ang caloloua co sa tiuasay na raan nang iyong mahal na aral, at sa pagpanao dito sa buhay na malait, ay maguing dapat casihan nang iyong mahal na gracia, nang panoorin at paquinabangan Ca sa caloualhatian sa Langit magpasaualang hangan. Siya naua.

ISA PANG PANALANGIN

SA CATAPUSANG ARAO.

¡Aba balon nang carunungan! maestro nang Teología, ilao nang mangã mangãngaral, Doctor nang mangã Doctor hali-

gui nang santa Iglesia, calasag nang pananampalatayang cristiano, tabac sa mangagreges. ¡Aba Agusting bulaclac nang mangamatatalas na bait, at tauong inaralan nang Dios! na cun ihalimbaua ca sa mangang Santos, icao ay casanto-santosang, at cun sa mangamarurunong, carunungdunungang ca. Pacundangan doon sa graciang matibay at mapilit na ipinagcaloob sa iyo nang Panginoong Dios, na tungmaos at nanaimtim sa puso mo na pinacalinislinis, at pinaui ang dilang caibigang lupang quinaiuilihan mo, at pinaliuanag ang iyong bait na pinaalis at pinapanao ang mangacamaliang iquinalalabo, at minulat ang iyong mangamata nang mapanood mo,t, malasmasin yaong camahal-mahalang liuanag, at nang pagpacatulinan mong haboli,t, alinsunurin ang cabangohan nang mangabay sa Langit: aco,i, nagaamo-amo sa iyo, Ama co, at dungmaralangin na igauad mo sa aquin ang iyong camay, nang aco,i, macaahon dito sa mangacasamaang quinabalonan co, at macapagbalic loob na totoo sa Dios co, at macapagsisi,t, macapagdusa nang tapat sa mangacasalanan co.

Pacundangan doon sa catamisan at biyayang calinalinamnaman na ipinamuti at ipinayaman nang Panginoong Dios sa iyong caloloua, at pinagcalooban nang madlang catouaan, at guinilio nang maraming pagdalao niya sa iyong loob, na ga naaaninag at naquiquiniquita sa manga


gaua mo: aco,i, nagaamo-amo sa iyo, Ama cong casanto-santosang, na idalangin mo aco sa Panginoong Dios nang graciang icauiiuli,t, icalalamhot nang puso co,t, ica-tututo cong manalangin, at icaaalam co pa,t, icaquiquilala, na cun sino aco at cun sino siya, at ang pagca dapat paualang halaga ang lahat nang balang na, liban sa Dios.

Pacundangang sa catacatacang pagcahu-say, pagcacaayo,t, pagcariquitdiquit nang tanang manga cabanalan na ipinamuti sa iyo nang Panginoong Dios, at alang-alang doon sa mahal na banaag na inihulog nang Panginoong Dios sa iyong caloloua, at nang ihalal cang maestro,t, ama sa gayong caraming Religión sa caniyang santa Iglesia, aco,i, dungmaraing sa iyo, mapalad na santo cong Ama, na idalangin mo aco sa ating Panginoong Dios nang graciang icatutupad at icaaalinsunod co sa manga ipinagpasunod mo, ihingi mo naman ang manga mahal na Religión na pinagpupunan mo, na ang sinusunod baga,t, pinipintuho nila,i, ang Regla mong quinatha, sampon nang iba pang calahat-lahatan, ay paraparang maquinabang din sila nang manga biyaya,t, graciang ipinagcaloob sa iyo nang Panginoong Dios, at nang maisulat mo yaong Regla.

Alang-alang doon sa carunungan mong lalong lalo sa carunungan tauo, na ipinag paliuanag nang Panginoong Dios sa iyong

calalim-lalimang bait, at binungcal ang mangā cayamanan sa santong Sulat, at ipinaunaua ang mangā lihim at matataas na misterio nang santong Pananampalataya natin, sampon nang mangā lalong malalalim at marilim sa mahal na Teología, at nang sa iyo parang bucal na namamarating malinao at malalim ay magmulang umagos at umanod ang mangā ilog nang totoo,t, tiuasay na aral sa Langit na idirilig at ipagpapalago sa mangā halaman nang santa Iglesia. Aco,i, nagaamo-amo sa iyo mabunying Doctor, na nacaliuanag sa boong sangmundo, na idalangin mo aco sa Panginoon Dios na pagcalooban aco nang loob na mababa at mauilihin sa aral na itinuro mo,t, itinuro nang Ina nati,t, maestrang santa Iglesia, apostólica, romana. At yayang inihalal ca nang Panginoong Dios na haligui at catibayan nang santa Iglesia, at tabac nang mangā ereges na dito mo mamacailang pinaquipaglabanan, at sa toui touina,i, dinaig pinapangayupapa pinasuco mo sila. Tingni, santong Ama, at cun gaano ang paghihirap at pagcacasaquit ngayon nito ring santa Iglesia, at ang daming halimao sa infierno na dumurouahagui at gumugubat sa caniya, ay magpatirapa ca sa camahal-mahalang harapan nang casanto-santosang Trinidad, at pag-aamo-amoin mong daingan, na ipagsangalang at iadya ang caniyang mangā campon na ovejas dini sa mangā ganid na

halimao, ituro,t, ipanuto sa catouid-touiran
at cabulusang daan nang aral nang santo
Evangelio, nang dumating na maloualhati
diyan sa caguinha-guinhaaha,t, lubhang
mapalad na buhay, na iyong quinadoroo-
na,t, pinaquiquinabangan. Siya naua.



MAÑGA TOUANG DALIT

NA PAGPUPURI SA MABUYING AMANG SAN AGUSTÍN.

Sa sinta,i, serafing tunay
Querubing sa carunungan.

*Agusting Amang marañjal
ilao nami,t, paraluman.*

Pananaghoy ualang humpay
niyong pusong nahahambal
nang Ina mo nang mamasdan,
casiraan mong nacamtan,
pagamin mo,t, pagtataman
sa lihis at maling aral.

*Agusting Amang marañjal
ilao nami,t, paraluman.*

Bautismo,i, nang iyong camtan
Himnong *Te-Deum* minulan
ni Ambrosiong Pantas Paham
sumagot ca,t, nagsaliuan
cayo hangang nauacasan,
lupa,t, Langit ay nagdiuang.

*Agusting Amang marañjal
ilao nami,t, paraluman.*

Dios ay nang paglingcoran
nagtumago ca sa ilang,
doong mo agad linalang
Religióng cagalang-galang,
nagangquin nang iyong ngalan
na sa mundo,i, cabantogan.

*Agusting Amang maraṅgal
ilao nami,t, paraluman.*

Pitong puo at cun ilan
na manga Religióng banal
tinangap nila,t, quinamtan
quinatha mong Reglang mahal,
at ang siya,i, tantong hagdan
sa sinta nang pusong tanan.

*Agusting Amang maraṅgal
ilao nami,t, paraluman.*

Si Cristo,i, sa pobre nagay
naguica nang mahinauan:
Agustinong Amang Paham
icao ang hirang co,t, halal,
sa Iglesia co,i, pagbinlan
itangol mo,t, isangalang.

*Agusting Amang maraṅgal
ilao nami,t, paraluman.*

Isa pang caloob naman
ni Cristo,t, nang Virgeng tunay
bibig mo,i, pinaraloyan
gatas nang Inang maalam,
gayon din nang dugo naman
ni Jesús sa taguiliran.

*Agusting Amang maraṅgal
ilao nami,t, paraluman.*

Bagay ring cababalaghan
cun *Te-Deum* magsaliuan,
uicang *Sanctus* cun maturan,
puso mo,i, naglulucsohan
sa quinadoroonang cristal,
bigay puri sa maycapal.

Agusting Amang marañgal
ilao nami,t, paraluman.

Águilang matang malinao
sa mangá Doctor cang arao,
dilag mo,i, nacaca-campan
sa Iglesiang cabilugan,
at ang sa Dios na aral
maliuanag mong sinaysay.

Agusting Amang marañgal
ilao nami,t, paraluman.

Tabac nang Dios cang hirang
sa sangeregeng caauay,
sinapol mong inihapay
aral nilang bagay bagay,
at sa touing paglalaban
icaò rin ang may tagumpay.

Agusting Amang marañgal
ilao nami,t, paraluman.

Dios iyong dalanginan
sintahin naming matibay.

Agusting Amang marañgal
ilao nami,t, paraluman.

ANTIFONA.

Casanto-santosang Patriarca Amang san Agustín, landas nang matotoid na asal at tagapag-unaua nang dilang cautusan, ilao nang mangá Doctores, at salamin nang aming buhay: maguing pintacasi naua naming maalam sa harapan nang Dios.

v). Ipanalangin mo cami, maloualha-ting Amang san Agustín.

r). At nang cami maguing dapat mag-camit nang mangá pangaco ni Jesucristo.

PANALANGIN.

Panginoon naming Dios: yamang pinag-himalaan mong panibago ang iyong santa Iglesia niyong nalilimpoc na papairi,t, apoy na nangunguna sa caparangan sa mangá taga Israel, nang pagpapahayag mo sa mabunying Amang san Agustín nang lalong calalim-lalimang Misterio nang Carunungan mong ualang hanga, at nang pag-papa-alab sa puso niya nang ningas nang mahal mong sinta, ay magdalita ca, at ipagcaloob mo na ituro cami niya nang pagtauid naming maloualhati sa mangá tucso at capanganiban nitong maralitang mundo, at tuloy aming camtan ang pangaco mo sa aming bayan nang dilang toua na ualang hangan. Alang-alang cay Jesucristong Panginoon namin. Siya naua.

Ang Illmo. Señor Doctor D. Fr. Pedro de la SSma. Trinidad, Arzobispo dito sa sangcápoloan, ay nagecaloob nang apat na puong arao na indulgencia sa touing arao-arao sa balang macacanta ma,t, magdasal man caya nitong dalit sa mabunying Amang san Agustín; at gayon din naman nagecaloob nang apat na puong arao rin na Indulgencia sa balang magnovenas nito.

Laus Deo.